

TEZAU LITURGIC
15 NOIEMBRIE
RUGĂCIUNEA SF. CUVIOS PAISIE
VELICICOVSCHI DE LA NEAMȚ

О, вели́кий наста́вниче и учи́телю премудры́й
всех ча́ющих спасе́ния и подвига́ духо́внаго,
преподо́бне о́тче наш Паи́сие!

Ты́ от ю́ности любве́ ра́ди Бо́жия оста́вил еси́
оте́чество твоё и, в и́ных страна́х безмо́лвия
ища́, во Святе́й Горé Афóнстей и оби́телех
и́ноческих Молдовла́хия Небе́сное бога́тство
обрел еси́. Ты вели́ким воздержáнием, в трудéх,
тесно́те и кра́йнем лишéнии плоть свою́ духо́ви
покорив, сокруше́ние нелицемерное, трезвёние
бодренное, безстра́стие анге́льское, моли́тву
сердечную́ стяжа́л еси́, и сими́ обновите́ль
древня́го и́нчества и столп Правосла́вия
показа́лся еси́ и, яко́ учи́тель, наста́вник и отец
чадолюбивый, свяще́нный вертогра́д учени́к
твои́х, иже простре́ о́трасли своя́ во вся концы́
Росси́йския земли́, насадил еси́. Сего́ ради́,
услы́ши нас, грéшных, ве́рою и любóвию
призыва́ющих тя и вонми́ проше́нием на́шим.
Умоли́ Всеще́драго Бо́га, да сохра́нит святу́ю
Церковь Ру́сскую и вся́ святы́я Церкви
Правосла́вныя в сою́зе ве́ры, ми́ра и бра́тския

любе́, па́че же от раско́лов па́губных и
междоусо́бных нестро́ений изба́вит и в
непоколе́бимем благосто́янии утверди́т, во
спасе́ние всех и́стинно испове́дающих пресвято́е
и́мя Его́. Испроси́, уго́днике Бо́жий, оте́честву и
наро́ду на́шему мир и благоде́нствие, избы́лие
плодо́в земных и благоустро́ение ве́сей и гра́дов
на́ших, оби́телем же ино́ческим житие
богоуго́дное, да сла́вится в них пресвято́е и́мя
Го́спода Бо́га и обре́та́ют в них ве́чное спасе́ние
любя́щии Его́. Помози́ нам, в су́етном и гре́шном
ми́ре сем стран́ствующим, о́тче преподо́бне, и
умоли́ Го́спода дарова́ти нам оставле́ние всех
прегреше́ний, и во исхо́де душ на́ших изба́вити
нас возду́шных мыта́рств и муче́ния ве́чнаго, да
моли́твами твои́ми узре́вше неизрече́нную сла́ву
Христа́ Бо́га, возблагодарим́ тя, яко засту́пника
и предста́теля нашего, и прославим
Безнача́льную, Единосущную и Неразде́льную
Тро́ицу, Отца́ и Сы́на и Свята́го Ду́ха ны́не и
при́сно, и во ве́ки веко́в. Ами́нь.

**Текст молитвы преподобному Паисию
Величковскому утвержден к общецерковному
богослужебному употреблению решением
Священного Синода от 17 июня 2021 года
(журнал № 34).**